

四庫全書

集部

欽定四庫全書

集部

清正存稿卷六

詳校官庶吉士

臣李傳熊

主事

臣呂雲棟覆勘

總校官進士

臣朱

鈐

校對官中書

臣高

中

謄錄監生

臣邵敬修

欽定四庫全書

清正存稿卷六

宋 徐鹿卿 撰

頌詩

明堂慶成頌并序

洪惟聖宋十有四葉皇帝御極之二十二年所以培高  
浚深襲休垂鴻以對於神祇祖考者蓋已素矣乃季秋  
之月將有事於明堂遠維成周嚴配之文近稽皇祐一  
王之典蔽自聖心奉寧考並配鉅麗偉特焜煌翕赫臣

民咸曰休哉先三日列辟造廷奏啟齋宿有語於門者  
曰上自朔旦茹蔬止酒矣既入有衛士相告曰上親禱  
于天章閣矣及時將祭冠佩咸集侍班南廡下有閣門  
老院舉手加額忻然診于衆曰上明禋凡七然景氣澄  
晏無若今夕可謂與天地合德矣聞者莫不動色相慶  
臣因伏惟夫微之顯誠之不可揜如此皇帝端居法禁  
一念所發而天地鬼神臨之都民走卒誦之迄禮之成  
百休昭貺臣於是知流離盜賊不足憂外夷敵國不足

平乖氣可消和氣可格特在終始此一心爾臣幸得以  
職事周旋俎豆間與觀盛典而又叨侍經幄許得以文  
墨自見謹撰成明堂慶成頌一首凡二十四章章四句  
冒昧繕寫以聞雖詞理淺薄不足摹繪日月之光然情  
意所在亦微臣拳拳忠愛之義云其詞曰

穆穆聖皇出震乘乾二十二載如日中天大祀有彝親  
享凡七嚴父配天昉自今日遠稽前載其在成周皇皇  
宗祀奕奕垂休近參家法有若皇祐一祖二宗於焉並

脩時維秋季涓吉中辛本以忱敬秩以儀文皇在原廟  
推迹本始錫慶儲祥仙源演迤皇入太室裸獻必躬列  
聖在天時降于宗皇升玉輅齋莊中御一塵不驚六飛  
如舞皇登陽館幣王交陳五位時序徧於羣神相維辟  
公耆俊布列珩璜鐔鳴邊豆豐潔樂既具奏佾舞工歌  
八音克諧兩間浹和秋空無滓萬里一碧璧月珠星瑞  
光浮溢忽焉低垂非煙非雲若降若接郁郁紛紛彤璽  
潛通受胙飲福移班紫宸高呼三祝祭澤下流肆耆端

門雷雨既作草木皆春人曰吾君兼旬蔬食孰知陟降  
常在帝側人曰吾君精禱天章孰知明德日薦馨香凡  
皆可為天不容偽眡此休嘉豈其力致一念之善神人  
具懽朝野傳夸中外鎮安流民可綏夷狄可滅天且弗  
違人誰敢越前星必耀年穀必豐人所同欲天寧弗從  
侔德周成儼美仁祖於萬斯年受天之祐若古有訓明  
命難謏雖休勿休惟單厥心我將不作臣竊其義請誦  
末章夙夜祗畏

明堂慶成詩并序

恭惟皇帝陛下自登大寶至於淳祐八年裡祀凡八方  
詔旨初下靡日不積忱致欽申飭攸司期以對越是歲  
秋仲將有事于明堂而零雨其濛采日未止上憂形玉  
色弗懈益虔先事歷吉祇告原廟起視霽色澄湛景象  
清穆既謁太室衆以燠潤故疑懼旦而玉輅徐驅揚鸞  
鏘鳴成禮之夕碧空無雲明月在地儀節叶度樂舞之  
奏神靈顧歆內外懽悅上心怡愉下至奉璋執俎之臣



以至三軍萬姓之觀禮望幸者填溢充塞翕然同辭莫  
不忻然相告曰不休哉我皇懿德純敬上對天心下符  
人心亨運重開昉自今始將至於萬萬年無數臣幸得  
備數法從目擊盛典不勝踴躍贊歎謹拜手稽首綴成  
慶成七言長詩一首凡二十韻仰効歸美之意且以寓  
箴警之萬一云塵滓太清臣下情惶懼戰灼之至詩曰  
聖皇歷服萬斯年今構精裡第八番配合二儀嚴大報  
侑魚三后有常尊純心實德期先盡縟典彞儀匪漫繁

淳祐本因皇祐制民心所欲聖心存季秋肇卜中辛吉  
旦氣深憂宿霤昏寐月齋居忘肉味寸丹靡日不天閭  
倣臨原廟清風穆既駕鑾輿曉日暎明德馨香非黍稷  
真機軒豁露乾坤高空不夜天澄湛大樂同和景晏溫  
福祿穰穰綿帝賜本支奕奕慶文孫誕敷解澤傳鷄赦  
環列臣工肅駿奔河海晏清成鉅典神祇安樂衍璿源  
無前休美方揚厲持敬工夫重討論武帝中年愔內慾  
明皇晚歲異開元願將英斷克剛健早正皇儲立本根

駿骨廣求來冀馬鳥巢不毀集庭鵷長存鯁亮為元氣  
痛絕陰柔杜倖門肅正紀綱強國勢細分臂拍鎮侯藩  
微臣何幸逢熙事奏雅終篇罄誓言執戟從官今老矣  
華封祝壽報君恩

五言

湛泉送客二絕句

吾生如寄耳嶺陞又三年政自歸心碎那堪送客船

其二

中年懷易惡更聽斷腸聲多謝兩榕樹逢人管送迎

護法寺勸農呈秘丞

出郭置塵遠勸農德意宣旌旗清賞地蓂莢嫩晴天犬  
吠柴門曉牛肥草在鮮殷勤觴父老和氣釀豐年

贈曾司戶

君家螺江頭我家劍江邊千載會相望飲水同一川竭  
來古梅關相識春風前高義軋層漢清譚響幽泉努力  
效徃哲勿為時俗牽

詠蘭

叢蘭抱幽姿結根托山壤所據良孤高其下俯深廣雲  
氣接清潤雨露從資養雖然翳深林未肯逐衆莽輪蹄  
紛紫陌誰此事幽賞幽賞縱不及香風自來往

酬正錄直學二首

我生愜幽尋訪古梅花邊道原渺無際滄海滙羣川仰  
之歎彌高立則參於前為山始覆簣掘井當及泉端期  
會真意可但窺陳編再拜禮雙趺清風生誦絃

其二

劍水望梅關山川接鄰壤前哲餘典刑多士德心廣曾  
子重而厚朱張妙存養吳子粹而雅筆耕懲鹵莽有友  
五人焉亦足共清賞烟然玉韞櫝持此將安往

酬衆士友二首

行歌有妙趣聲滿滄浪邊岱嶽宗衆山渤澥傾百川今  
人悉闇投無因難至前古人貴漸進有本如原泉周程  
不可作三歎撫遺編正音渺難聽蛛絲潤鳴絃

其二

大鵬息天池，蚯蚓潔槁壤。吾儒苟自適，心與天地廣。受  
之不為泰，鍾鼎備榮養。挽之或不留，林野歌浪莽。陶詩浪莽  
林令譽妙文繡，片言榮爵賞。物理有乘除，大來斯小往。

次曾司戶見貽之韻併餞其行

聞道常苦遲，生世何用早。洛學此開端，文義富論討。高  
山勞景仰，內鏡幾回照。此心同古今，一理該衆妙。

和黎丞梅閣嶺

峭壁接高天，閒雲淡橫嶺。稍便僧房靜，未覺官曹冷。風月兩閒人，山川一佳境。誰與共此樂，老仙白垂領。

判府羅郎中舉似快閣佳篇輒次嚴韻

此菴湖海士，心學富家傳。德量擎天柱，功名下瀕船。風流今尚爾，頭角已蘄然。蚤晚分清切，輸忠雨露邊。

輓陳太庾二首

前身簡齋老，今世令河陽。眼底功名小，胸中書傳香。清談了公事，餘力到詩章。鳬履今安在，清都侍紫皇。



其二

一病成疎隔琴堂入見時形癯已非昔客至尚談詩手  
墨松煙濕聲歌雝露悲春風誰管領

前賀生日詩語

梅月重相思

再遊梅關書呈黃幹

雲邊大庾嶺嶺上一叢林送往迎來路升高望遠心年  
華今復古人事古猶今惟有關門石相看歲月深

次黃幹梅關韻二首

老盧行法地千載復抽關崖石橫雙翠禪機滿一班兩  
泉涵定慧半榻卧雲閒著我談風月真成出世間

其二

相逢白蓮社失脚過前溪野興雲橫浦禪心絮著泥梅  
花大庾嶺鉢石古招提擾擾仕途夢從前幾箇迷

廬陵書院次陳明叔韻

西風下黃葉客裏上新愁許我聯舟渡從君借箸壽坐  
糜三月久寬作兩旬留聚散一場夢邯鄲鼻息齁

快閣書呈吳宰

千里江章路登臨獨此雄清波長夜月落木又秋風浪  
芷浮花外盟鷗狎鷺中詩魂蘇醒在十載豫章公

丙戌年新春偶成

新年十許日才有一篇詩鄉思風中亂春心雨裏知病  
緣衰驟至懶與睡相宜暗思泉溪上杜鵑啼故枝

感興二首

吹竽媚所好乞墻厭其餘邇來效尤者徃徃拾芥如

其二

浮名豈不榮遺道亦安忍君看趙孟徒千古同一盡

春日

地冷春無力野晴天有功芝蘭傲幽谷蓬藿長東風政  
以身為患非關詩得窮且求吾適意敢擬衆人同

小英石峰

舊作英巖隱今為庾嶠行雖然一拳許有此數峰青嶂  
崢嶸凡目堅剛悖世情墨卿相指似只尺是蓬瀛

送太庾黎丞二首

老矣黎夫子拳拳只此書萬緣俱淺澹一字不遺餘庾  
嶺風煙句石溪雲水居無人知此味說似子非魚

其二

客懷秋易惡送客更當秋薄宦相從久孤征肯暫留酒  
輕離思重目短大江流黃菊聊持贈寒香晚不羞

次瀛父詩

青山闔門戶綠竹窺簷楹歸然一亭石境界涵幽清李

侯昔經始扁以橫浦名亭前兩泓泉吞吐寒蟾明方圓  
中規矩曲水相紆縈汲溉當瓶盎觀覽駢簪纓黃君靜  
者徒道號靜寄磊落千人英竭來梅花邊一見眼為清官居  
廉泉上復此逢清冷詩豪瀉銀漢興逸凌紫京回首聲  
潺潺恍如醉翁亭

林判府和前韻見示且約暇日論茗次韻為謝  
昔我觀西湖碧瓦陰丹楹冷泉一泓玉占斷錢塘清南  
來沂西江灘以十八名出門訪廉泉醉眼增雙明平生

山水性不著塵俗繁佳處輒留憩竟日陪衿纓薄宦落  
橫浦師友皆豪英尋勝得湛泉古甃莓苔清上有石崖  
峻下有沙水冷韓沙水光冷也近可俯貢川謂廉泉也遠可企吳京  
謂冷泉也為公飲春茶日日來新亭

府判再示楹字韻詩再和之

別駕寶橫道冷官槁代楹誰令塵土姿近映冰壺清君  
家閩山陽泉以蒙著名家有蒙泉平生養正功炯炯心地明  
我家古泉溪四顧巖巒縈蜀道難百步九折縈巖巒日迂長者轍來

往紛振纓湛泉偶趨風漱液咀流英

張衡思玄漱飛泉之瀝液兮咀石菌

之流

古榕憩陰陰綠竹哦青泉鳴似喚客盈耳清音

冷

陸機文賦音冷冷而盈耳

歡謠動海隅溫詔來宸京只今遊覽地

回首真郵亭

出灘賦灘石

蹇我聶都山豫水茲發源始者才濫觴其流細涓涓東  
行介南埜章水西入焉又東漸雄張有州故名虔貢水  
遠來赴融合為贛川當其初合時泓渟匪為淵中通尺



五流玉虹卧蜿蜒羣山來左右萬石梗後前初疑牧羣  
羊忽訝墮飛鳶伏犀狀魁傑浮鴈影接連阿河陣敢死  
赴浴池連錢下者宛蹲踞上者將騰蹇或矯首欲鬪或  
宛留安眠或退然深伏露尖大如拳或竦然特起儼立  
高齊肩或兩兩為偶或伍伍相連此有一席平彼有萬  
竅穿齒齒漱寒冽眼眼開青圓形模互馳騁氣勢相吐  
吞平坦十數丈變怪紛百千顧盼不暇給算數疇能殫  
天公轟震霆力士推雷門上下相舂撞對語不得聞衆

灘角巖嶮四灘獨稱專其一曰天柱豎立如登天幽深  
下無際渦盤矗迴旋其下為舞索風柔飛翩翩絕流迤  
而東虵蚓相縈牽大了與惶恐殆見伯仲間輕駛疾於  
箭號怒沸若煎下此得安流衽席過舟船我生若萍梗  
薄宦遊梅關三載兩經過每過心為寒酌酒問長江胚  
胎始何年胡不事夷易而樂從險難江神信靈異恍惚  
若有言吾來卜居此肇自開混元清兮伏塵滓介如抱  
剛堅一片朝宗心萬折無變遷所樂在魚濟未始間愚

賢征人鬧懂懂鷁首浮翩翩吾力所能任登岸常相先  
雖然有觸齧自取非吾愆清獻昔疏別不露斧鑿痕至  
今虎城下滾滾流遺恩坡仙逐海南為世所棄捐風帆  
一葉身詩句萬口傳灘石本非險人自以險看委蛇曲  
折間道徑自平平子行但由中坎窞居其邊子舟要適  
平輕重防其偏乘流亦良便避礙須達權五湖瑩如鏡  
瞬息風濤掀嬉笑或藏怒至愛存咎鞭灘石信非險險  
處却萬全我聞說是義心思俱豁然一笑過灘去落照

銜山前

雜興六首

荒涼橫浦郡頗稱冷官居為甚更清睡久來不讀書

其二

梅花亦何寄偏便幽人愛清寒風雪夜一枝靜相對

其三

竹枝雙翡翠縮頸照寒水鷺見渡溪人一聲忽飛起

其四

庭蘭尚牢落庭草已勾萌草與蘭何似東風亦世情

其五

豈不謀數椽吾力苦未足破屋儻支撐尚堪燈火讀

其六

學詩不能神得句常草草儻可寄吾懷豈必人稱好

月夜赴郡會歸輾轉不成寐觸事感懷

庾山高入雲章水清見骨山高晚宜梅水清寒浸月美人天一方雲烟妙空濶帶月簪梅花獨起舞殘雪

其二

槎牙兩榕木偃蹇江之濱雖緣擁腫廢幸免尋斧斤東  
家不鳴鴈喑默存其神事固不一槩鴈烹木長春

其三

連雲峙華屋東隅滿荆棘延緣耗地利狼籍窺空壁一  
朝火燎原根枝蕩無迹蔓除亦可喜火烈憂轉劇

其四

騎獵似為業養鴈如養兒人言鴈玩兔主翁鼎鑊之玩

兔信不忠九死固其宜萬一疑似間羣鷹驚欲飛

賀判府生子

西江最上流南安古名城庾山蔚然秀章水瀏其清異  
代得偉人分此風月平往者程伯溫關決錚有聲煌煌  
萬金產炯炯雙珠明四海名父子一門佳弟兄造詣極  
洙泗叩擊鏗英莖流風已百載今日復一程提屏東方  
來寬令孚羣毗名門衍餘慶蘭玉添新榮山川萃神秀  
宮庑儲精英仲律青陽熙五夜璧月盈天上雙麒麟剛

欲逐隊行抱送者釋氏協夢兮長唐昔為程氏子俱以  
斯道鳴今為陳家兒岐嶷由天成覓公洗兒錢我不學  
世情期公愛子深視厥程先生器質待涵養門戶須支  
撐會看三世間接踵當巨衡

七言

之官過贛灘二首

玉局詩中惶恐灘聞之已為骨毛寒那知舞索并天柱  
尤險二灘更向前頭作怒瀾



灘聲嘈雜怒轟雷  
頑石參差撥不開  
行客盡言灘路險  
誰教君向險中來

雨霽報謁見一鷺得魚羣鷺爭食之二首

一鷺翩翩傍釣磯  
隔汀羣鷺已知機  
空將辛苦供羣吻  
畢竟貪魚罪有歸

履險窺魚得幾何  
傍來攫取較多多  
爭如歛翼餐餘粟  
猶在人間潔白科

壽曾僉判二首

漸報星橋鐵鎖開遊仙失脚下蓬萊一番春色歸桃杏  
半吐歌唇獻壽杯

陸地新開萬朵蓮綵雲擁出幙中仙傳巖已入春宵夢  
火急排雲叫九天

和杜子野湛泉詩來詩有塵事分清事之句

榕陰漠漠俯清泉泉溜涓涓不計年未必塵紛敗佳思  
凭欄得句却天然

子野又以詩來言不盡涪翁畫李翁再和之

太守一時留惠愛詩仙萬古自清風尋常藻繪初何記  
終是人心記此翁

聞鴉有感

鵲羣饒舌本何功鴟陣狂言却似忠聞鵲忻然鴟輒唾  
甘諛易售古來同

容齋續筆言北人以烏喜而鵲為凶

讀楊妃傳

六宮粉黛溢三千一箇中間寵愛專自此世情生妄想  
推排妃子作神仙

世俗見明皇溺愛貴妃遂指為神仙中人妃固非不美而未必真冠代也

徒以六宮之衆無一當意獨妃得以專寵故想像其不可及世間事如此者何限詎止一妃也哉

曾氏清江亭

想得當年月浸局諸公翰墨此縱橫亭荒久矣詩無恙

一道長江萬古清

有無垢澹  
菴真蹟

杜子野寄雲山蘭石四畫且以近詩來和韻酬

之二首

石瘦蘭馨入骨寒筆端往往帶儒酸河陽桃李春風滿

此段煩君更畫看

愛君標格碧峰青為輟床頭竹葉瓶想得醉餘鋒穎健  
羣鷺端欲博黃庭

和杜宰送茶韻

誰遣持書畫打門茶魁有句牧之孫牧之云茶為瑞草魁煎調還

我西江手水茗相投自不渾

又韻

月團不遣貢脩門却寄書癡閉戶孫若把蕉坑分品第  
澹功端合遜王渾

杜子野惠來禽內碧桃謝以一絕

五色雲箋到冷曹更將菓實飽詩餐便應譜入來禽內  
青李刊除著碧桃

子野惠竹飀有感而賦二絕

形如虎大極肥

玉局詩中曾識面小山書後忽題名  
鷗夷混沌俱慙遜更勝河豚太瘦生

坡仙云鷗夷讓員滑混沌慙瘦爽

食根為飀肥腰腹

食竹根鼠也

食實為凰長羽毛同是此君

供廩餼居然地位判卑高

七月二十一日重過贛灘十絕句

矯矯雄張虎欲奔  
低低蹲伏鴈成羣  
丁寧莫礙行舟過  
喚作長生萬石君

其二

初疑萬馬立沙汀  
又似臨流簇戍兵  
激怒灘聲能許劣  
終宵長泄不平鳴

其三

漱崖嚙石出奇功  
浴月涵風淡蕩中  
過者千帆開如織

會心知有幾人同

其四

乘居山徑若崎傾舟涉飛湍石膽驚等是危途休計較  
此心無礙盡堪行

其五

北來快順一篙駛南去間關百丈牽世事從來且如許  
下灘船看上灘船

其六



嶺海脂膏自古傳至今來往共長川  
川靈有眼還知道幾箇歸人月滿船

其七

江清端可樂調飢險處行人盡得知  
平陸波濤良叵測險中却自是平夷

其八

聞道春江歟艷時灘平如掌棹如飛  
何時滿却葵丘戍流水桃花送客歸

其九

十八灘頭一葉身  
山川曾識舊詞臣  
詩魂百載猶蘇醒  
應笑風波解戲人

其十

諸潭初發未朝餐  
一日經行十八灘  
不似來時推不進  
吟詩把酒傲驚湍

廬陵試院次陳明叔韻

曉看窓影過飛鴉  
短髮蓬鬆一半斜  
兩月不遊真瘦却

夢尋庾嶺訪梅花

梅花

舊傳庾嶺梅花好及到梅關少見梅  
惟有一般差可信  
南枝長占小春開

觀釣

熱猶造請襦襪子老未知休  
雙鑠翁立懦廉頑今幾見  
桐江夢想一絲風

府判社日招飲蔣園座中索賦詩三絕句

玉妃圍坐簇娉婷勾引陽和媚德星洗盡凡花脂粉氣  
月香亭是雪香亭

城西好事主人家走送天香國色花嶺陞三年才見此  
便應奴婢命山茶

柳絲搖曳春風裏山色空濛社雨中領畧韶華拚一醉  
巴歌聊爾效南翁

再續前韻

鶯谷聲喧雨乍晴邦人引領望屏星陽和一氣元無際

小為尋花到野亭

荷囊清白舊傳家  
來看溶溶月下花  
不似尋常殺風景  
也宜飲酒也宜茶

筆端鸞鳳詩千首  
社下雞豚酒一鍾  
九十日春今強半  
典衣還憶少陵翁

依前韻呈府判

城南煙雨趁春耕  
遙指屏星是福星  
肯學晉人耽燕樂  
只因脩禊會蘭亭

占籍蓬萊第一家勸農時稻莫時花時和不但歌華黍  
牆有柔桑焙有茶

發舒生意烟花外醞釀豐年雨意中關決郡條知有助  
故應千里化文翁

月香亭主人送以牡丹座客作芍藥品題

翌早知其

誤二詩謝花勿怪也

素粧芍藥萬花王葉未全舒滿國香醉眼瞢騰渾不醒  
虎賁却似蔡中郎

其二

玉容當配水仙王  
壓盡羣花不敢香  
晝困未甦酣宿雨  
也疑湯餅試何郎

愛山堂七絕句

并引

愛山堂大庾之西館也始名裕民繼超然近  
世浚儀趙君為令始易今扁南安居嶺北環  
城大抵皆山而面勢局隘以偏惟斯堂對五  
侯峰太平山圍繞於後如簾幙中坐達觀疎  
林前橫溪流映帶一佳處也自有堂以來幾  
世幾年而未為山著語豈園乎形氣者有遇  
不遇山之與人固無以異乎抑造物者祕此  
奇觀將有待而發之與今令君史子東不鄙

謂余盡賦之因綴七絕句呈似余詩安足以  
發越造物之奇觀亦姑以慰此山之寂寥耳

寶慶丙戌夏

李二十日

橫江江上四山環少得當前面勢寬試上此堂舒遠目  
疎林盡處見峰巒

其二

大峰舒肆小峰峭簾幙中間坐五侯立斷斜陽吟不透  
一聲牧笛滿林秋

其三



竹籬茅店野人家門外清流一帶斜小隱桃溪端的是  
更須水上覓胡麻

其四

比屋桑麻三月雨夾溪桃李四時春誰歟幻出山前景  
指似堂中覓句人

其五

自有堂來三換扁官居賢否只山知醑醑嫵媚今何許  
山色青妍究舊時

圖志云裕民  
堂茶藤成架

其六

客問主人今暇否  
主人心與水雲閒  
庭空吏散文書靜  
茗椀熏爐上愛山

其七

坡谷經行久品題  
顧令迂拙強搽詩  
雖然何世無坡谷  
山立孤高好自持

贈琴士翁明遠併簡幹教二黃丈

鍾期不作伯牙死  
琴墮雲烟蒼莽中  
翠玉樓前幾識子

山風吹散又西東

去歲遊翠玉翁  
琴未至予先去

莫恨吾琴難入俗俗人不聽韻方高秦箏耳畔休拈出

韶石亭前走一遭

詩自曲  
江來

靜寄琴中適意吟魯菴句裏自然琴琴詩若要清如許

千古寥寥不覓賞音

我亦能琴妙不傳無琴無譜併無絃客來問訊琴安在  
指似孤鴻落日邊

章貢三咏

并引

寶慶乙酉仲冬既望鹿卿歸自螺川靜寄主  
人黃瀛父檢法黃丈司理李丈檢法趙丈鈴  
幹吳丈相約遊鬱孤訪洞天入崆峒道院觴  
客于袞衣葺齋堂酒半登紫翠玉樓用覽山  
川之勝瀛父不鄙謂余不可無以記之因成  
三小詩呈似且以志諸君子眷禮之渥云

羣山湧浪翠周遭中峙層臺氣象豪萬里闕庭長在望  
定應天眼照孤高

右鬱孤臺

崇山脩竹小蘭亭人在雲烟深處行環立千竿了清絕  
中盤一徑巧紆縈紛紛鴈鴛庭堆案擾擾蠅蝸市有聲

洞裏道人忘底事小橋西畔句初成

右鬱孤洞天

夢跨長虹海上遊寒生肌骨一壺秋好風吹得詩魂醒  
自寄雲間翠玉樓

右翠玉樓

上判府陳秘丞

斗大山州枕上流蓬山仙客此遨遊讀書竹屋公多暇  
樂業江郊民有秋泮藻叢邊深長育領梅香裏費賡酬

有人來問和羹味太守忘言一笑休

向來一榻下南州此事無傳閱幾秋顧我風流非孺子  
乃今天幸事王侯頽波甚矣誰能返砥柱歸然好鎮浮  
喚起東湖風月夢請為榱桷備兼收

酬溫戶見和首篇

南來冠蓋總名流契合全忘是宦遊清甚夜寒金井露  
瑩於霜曉玉壺秋梅關景物詩陶寫蓮幙風流酒勸酬  
只恐烏羅留不住漢庭山立看揚休

酬陳太庾二首

從來令尹職承流君亦牛刀嶺陞遊和氣滿城桃醉雨  
仁風四野麥先秋陳玄譜在交逾固毛穎功多賞未酬  
撫字勞心古如此不須為米便歸休

英聲獵獵滿山州翠剡飛來鶚在秋父母視民非俗吏  
子男分土列諸侯篇詩捲送驪珠爛杯酒相從蠟味浮  
不必即人人即我定知瑚璉合當收

酬何學賓二首

商山黃綺信清流自合相從鶴禁遊  
鄴架爛觀三萬軸莊椿行老八千秋  
高懷莫遣羣兒覺佳句那無半語酬  
我亦諸侯老賓客更將墨守問何休

昔聞鼻祖在揚州詩句清於玉露秋  
奕世相承忻有後在家還復勝封侯  
觀願義熟靈龜見祝壽杯深綠蟻浮  
丹鳳休銜丹詔下黃冠已懶待黃收

酬曾學錄王掌祠二首

夫君砥柱屹中流也肯來為泮水遊  
好句上摩周雅頌



褒詞榮過魯春秋高山忽奏音逾古美玉深藏價未酬  
搜遍枯腸難論報江淹聊欲擬揚休

去年射策古杭州來到梅關歲已秋德薄豈堪儀衆俊  
貧軀聊復客諸侯一窗燈火味清苦四座風流酒拍浮  
弟子無非樛櫟用先生未必副先收

酬張錄南老 二首

詞源輕寫峽江流曾蹋槐花月裏遊梅嶺詩篇一甌雪  
芹宮書策四山秋明珠小借枯崖潤美玉那無善價酬

再戰定穿三汲浪絲鞭席帽拜新休

生長西江帝子州螭蛄強欲語春秋  
既根正喜逢張籍拾芥寧堪擬夏侯  
冷淡工夫千兔禿飄零蹤跡一萍浮  
自量只合山林住烏帽如何也見收

酬張直學二首

漳水元通劍水流竭來庠序得同遊  
自從快踏梅花雪一洗從前茆瘴秋  
官況我今忘獨冷鳴聲君合起相酬  
龍光自有張華識句不驚人未遽休

平生久願識荊州  
落落參辰幾度秋  
下榻有誰知孺子  
運籌端合屬留侯  
吟成春草夢非夢  
跡漾風萍浮自浮  
見說桂枝消息近  
廣寒清徹片雲收

酬吳直學二首

滾滾詞源峽倒流  
飄飄擬上廣寒遊  
一編片泮挑燈夜  
兩捷槐花得意秋  
騰喜文盟堪共結  
忽驚詩債未曾酬  
數能相過徵奇事  
肯學淵明遣客休

慚無健筆敵蘇州  
蝸蚓聊鳴子夜秋  
問樂定應從季子

尋盟自許長滕侯佇看騰達飛黃去小共徜徉大白浮  
會有雞林識風雅一詩端把百金收

酬朱直學

二首

儒官領袖得名流子佩應無在闕遊只要松筠耐霜雪  
須知蘭菊自春秋年齡五十當榮顯風月三千足唱酬  
揚善推能需叶贊有容心地儘休休

南來草木半炎州喜見冰壺一段秋所學有原真父子  
自前無種是王侯傳家肯羨金鑿罍滿用世還知玉璞酬

人事盡時天理見但勤耕耨候豐收

酬楊直學二首

人生遇坎與乘流入則藏脩出則遊風順鵬鵬須擊海  
時來蟋蟀自吟秋教經已勝金籟贈遺錦慚無玉案酬  
著脚蘭臺自今始懸知下筆不能休

四海聲名揚道州亭亭心幹凜高秋耳孫自是千人傑  
骨相當為萬里侯春入草堂清夢透名登桂籍暗香浮  
錦囊正恨新詩少說與奚奴取次收

贈太和曾機宜

故家名姓塞乾坤曾上歐蘇涑水門  
似此高風寧幾箇至今流澤到諸孫  
談詩江上風烟圃訪我梅邊竹石村  
尚有典型堪世守會看溟海化鵬鷗

壽陳太庾

壽山輝彩照湖山管領春光又一番  
動地名聲太丘長傳家詩派簡齋孫  
梅關信息羹調鼎桃縣風流酒滿尊  
里社逢時公事在好施奇計復中原

去年修禊後三日得南宮捷報於家今年是日  
與同年趙簿同事泮宮感而賦詩

淡烟疎雨杏花天回首春光又一年月桂香中方並駕  
嶺梅陰裏競揚鞭覺來始悟他人夢著罷傍觀國手先  
一動靜間知造化吟情渾寄柳絲邊

趙簿見和復次韻

一昨瞻依尺五天青衫槐簡是同年飛騰影裏尋芳躅  
警蹕聲中響靜鞭夷路已看騰驥競風須遜畫蛇先

宗臣底事猶棲棘有策籌邊不在邊

酬黎丞見和

極目龍門峻接天仕途傾蓋便忘年  
太平官府閒吟竹勝處園林笑舉鞭  
松栢凌霜知獨後樓臺得月會居先  
老臣憂國誰能識飛雪飄飄上鬢邊

酬曾教正

襟懷瀟洒浴沂天家學相傳幾百年  
外物莫貪倉玉佩真才肯賈蠟黃鞭  
不平未用鳴東野懶讀難為誦孝先



賴有濂溪衣鉢在滿庭風月浩無邊

酬正錄直學

橫浦雖然一角天周程清化幾經年從前步武堪同轍  
近裏工夫好著鞭自笑已居王勃後相期常恐祖生先  
地麟自此符佳識魁宿聯輝庚嶺邊

酬何學賓

笑傲壺中別一天德人端合享耆年鳴鳩不相堪供杖  
老驥馳思詎假鞭儀表特居終賈上名聲突出勝王先

熊麗已入佳占未明月清風渭水邊

去歲王監獄以詩餞行且求無垢語錄次韻送

之

我來橫浦訪遺言無垢先生有正傳  
雙跡淒涼城下寺一書洩露性中天  
向來富貴俱荒草今日風流尚湛泉  
東谷有人知此意平生恥售蠟黃鞭

和張直學送新茶韻

夢繞康王酌水簾不知身世宦東南  
蘇仙忽餉蕉坑品

子上渾凝曉露甘便遏鼻雷醒睡思仍澆舌本發清譚  
搜枯破悶功神速數到盧仝椀兩三

壽提舉陳秘丞二首

南極星高月一弓天將好事慶仙翁朝中詔遣鮮于使  
境上民爭正獻公葵藿傾陽清瘴霧旗幢蓋海颺薰風  
梅關南北俱和氣祝壽歡聲兩處同

昔在興隆歲甲申文恭當軸秉鴻鈞

陳文恭公隆興甲申再相

如今

休運重開宋指日熙朝再相陳會有勲名價小戊肯將

官職怨雌辰百年盛事看層見請頌中興獄降神

再用前韻送地圖

光武帝興地  
圖正甲申歲

炎運中天歲甲申誰令漢鼎重千鈞故家興地傷瓜裂  
真主城樓細指陳今古一時如合券明良千載慶逢辰  
來年竹帛功名就圖繪雲臺筆有神

至梅關書呈僚友

栖迹梅花嶺下州梅關未到已神遊右江左廣山分水  
薄霧輕煙雨作秋物是人非一今古南來北往幾公侯

就中認得禪機者非錫非泉是道不

士友見和七月七日曝書依元韻謝之

寒儒家世派南州天遣芹宮並俊遊劍水章江千里月  
天孫河鼓一番秋曬書舊事聊同郝聯句新聲恐類侯  
隔歲槐黃頻入夢曾知山角已生不

送周幹

送客章江庾嶺邊試將行止問蒼天雖然別足終全璞  
尚有知音莫斷絃仕路偶來雲出岫歸裝何有月隨船

鼠肝蟲臂冥心久一笑掀髯對湛泉

郭府判書友于堂榜謝之以詩

鳥篆開端不露鋒  
錐沙成畫體逾工  
中間三到屋漏雨  
此後仍傳壁坼風  
義獻以來名絕學  
徽章之外更明公  
朝天此去承清問  
一片丹心筆陣中

堂礪雲霄扁友于  
黑蛟光射斗牛墟  
細筋入骨藏稜外  
妙手師心灑墨初  
只為忠誠珍柳筆  
多因節義重顏題  
知君清德光前古  
發露毫端直緒餘

廬陵曾省元求書見杜宰和韻餞其行

夫君漸是買臣年  
恥炫虛名賈蠟鞭  
斗酒新豐無飲伴  
宮袍采石託詩仙  
寒花傲節休嫌晚  
蟠木為容不假先  
更上詩壇參杜甫  
清譚相對紙生煙

三山周省元索詩依杜宰韻賦二章

一以謝杜  
之貺一以

贈周  
之行

清夢蘧蘧楚峽陽

來書頗有  
思家之興

鎔成句法味悠長  
栽桃小

試經綸手泛菊聊澆錦繡腸  
逸思已堪凌賀白  
高懷羸

得傲羲皇此中真趣人知麼愛酒陶潛不是狂

其二

閒呼斗酒醉斜陽欲說還休此話長笑我平生窮到骨  
羨君萬卷富撐腸向來一見梅初白別後重逢菊正黃  
潘縣主人如下問為言不減向來狂

林府判錄示近製依韻和呈

二首

奇寶寧容棄道傍名藩贊理令飛霜冀都便覺羣空馬  
魯市應無詐飲羊嶺陟雲烟新入詠天邊日月趣依光



吾民疾痛誰醫得好試家傳已效方

冷宦趨承木向陽窺斑良覺愧真長摩挲千里紅塵脚  
浣滌十年新學腸小節自期冰皎潔高吟滿聽月昏黃  
青蠅附驥從茲始底用行歌效楚狂

用羊字韻呈史君

曾揩醒眼奕棋旁松栢孤高耐雪霜西蜀搜奇到金馬  
南邦頌德繼羔羊梅邊生意傳春信筆底新詩燦夜光  
運動樞衡當接踵小煩千騎上東方

侍林府判齋宿舉似頃在海陽縣齋丁祭詩依  
韻卽席和呈

文星今夕照儒宮多士青雲路已通  
沾溉有原芹泮水吹噓無際杏壇風  
溫醇德意覃千里教養規模肇一同  
疇昔周程鳴道處鳶飛魚躍化鈞中

府判和答依韻上呈

芹藻生春水繞宮古蠲祠祀意潛通  
燈花飛舞看簷雨詞藻清新繼國風  
貳政坐令千里化論文騰喜一樽同

彬彬執俎鳴鸞者盡在明公和氣中

護法寺勸農呈史君

半載分符江水西幾曾一日事遊嬉忽聞千騎傳呼曉  
正是三春勸相時父老倚鋤聽號令兒童騎竹望旌麾  
東風歸路歡聲滿野草閒花索賦詩

史君寵和復依韻上呈

禾生隴畝自東西父老怡然市井嬉列郡幾人知此意  
五風十雨盡如時買牛已解田間劍分虎難淹嶺下麾

一任吏人來報事不妨遊戲作春詩

同日依齋宮韻呈府判

屏星小駐梵王宮  
草碧泉清一徑通  
細細秧針抽夜雨  
盈盈麥浪汎東風  
登臨不為溪山勝  
守助端期井里同  
此去豐穰知有兆  
百年父老笑聲中

寄題胡叔軫香山樓詩并引

鹿卿年二十三時得忠簡公斥和議書讀之  
竦然起敬持姓名質于長上則曰此廬陵澹  
菴先生也忠節為南渡冠因盡告以公生平  
出處之詳鹿卿服膺至今嘉定十七分教橫

浦乃獲敬讀公詩文而觀其遺墨未幾公之  
孫叔軫榮赴經從遂得瞻識故家典型宛然  
是似越明年北歸歎語益密出示名香山樓  
詩鹿卿載惟胡氏香山之名今烜赫如星日  
而白傳洛中之香山已久湮廢可歎也叔軫  
伯仲方有大名於時必將成忠簡之志使洛  
都復入職方而兩香山與冠霞同垂不朽可  
也鹿卿以自幼景慕忠簡之心既覩其詞翰  
又識其後裔之賢詎容以燕陋為辭輒  
賦唐律一章聊寫是意非敢言詩也

笑問香山似舊邪風流宛是更詞華由江距洛路千驛

諸公詩多引匡廬  
香爐峰事故云

以宋繼唐詩一家今日重簷窺斗柄

向來遺址面湖沙莫忘先世規恢策羸取芳名並冠霞

忠簡樓名

史君贈所臨蜀本三蘇入京圖詩以謝之

至和嘉祐正塗開綵鳳將雛出蜀來父子名聲天宇小  
弟兄筆力海潮迴岷峨一氣鍾三傑歐富諸公識異材  
後百餘年拜遺像凜然高節尚崔嵬

黎丞傳示史宰聾字詩走筆和之

毛穎翻成一秃翁文章苦欲誑盲聾從前結實無非妄  
勝處生涯好用工天上高深關守虎馬前奔走背生蟲

榮枯數定何須問了却公家是奉公

再和聾字韻詩一謝史宰一呈黎丞

化感兒嬉七十翁波餘猶足活瘖聾肯安恬退淡中味  
大覺催科拙處工及物坐看馴乳雉蘇民更欲罵尸蟲  
恢恢游及渾餘地贏得賡酬伴贊公

唐人呼丞相為贊公見太白傳

脩齡閬苑一仙翁拜跽無妨豈是聾松栢耐寒宜歲晚  
池塘入夢洩春工羣趨摘尾渾行鷺一見降心賦草蟲  
莫謂田園動歸興渭濱垂老尚三公

林府判和前三蘇圖詩再依韻為謝

蜀道山川鬼斲開  
文星屢謫北中來  
淩雲賦客邀難住  
捉月仙人喚不迴  
坡穎與泉同一姓  
漢唐比宋孰多材

公詩狀出眉州畫

元眉州本

不學香山詠馬嵬

張法示詩集為題其後

聞名每恨不相識  
相識梅關眼帶青  
雪榦冰姿披宿霧  
銀鈎玉唾麗繁星  
居憐山谷傳宗派  
系出燕公有典刑  
陶寫風光吟咏了  
更培勲業照青冥



次韻史宰賀受薦

玉立清規照眼新，封侯端合踵平津。公車久滿三千牘，

屬國猶淹十九春。

來書自喜登第十九春

一覩雉馴知善政，雙飛

鶚薦媿陳人。焦桐會有知音在，未必終為爨下薪。

送何生龔生歸曲江

肯為從師出嶺來，三千子亦可人哉。文章要似風騷體，  
學問非為利祿媒。泥迹尚留鴻爪在，雲程已報鶚書催。  
儀型只在鄉關近，前有張余後有崔。

和南康趙簿贈詩

瑞世詞章響佩琚過人學力更充餘盤空紫氣難藏劍  
照坐青藜趣校書已脫塵埃辭矮屋還將清泚映污渠  
雲霄此去功名逼詩酒生涯莫作疎

次史君喜雨韻併呈府判

明公閔雨志平民祈禱無他只一真萬里天高隨感應  
半空雷震忽亨屯挽回庾嶠生生意化作商霖處處均  
歸幹元功調玉燭從今三過續絲綸

次史君喜雨偈韻并引

未雨而禱雨此心之敬也既雨而喜雨此心之愛也躬行者愛敬之實也政事者愛敬之推也祠祀者愛敬之寓也詩歌者愛敬之發也曰敬與愛大人之事備矣此盛德之徵而鹿御之欽慕焉者也繼嚴押而賡之所以寫其欽慕之意蕪顙之弗羞則恃有宗匠斤斧也在也

朱輻臨涖甫經秋已報民庸總若疇賸有心思圖惠養更無毫末事誅求操存對越神明久應禱旋銷旱魃憂天意念功殊味別且將甘露畧相酬

田里懽傳歲有秋已占休證叶龜疇連朝霖雨忻從欲  
一念通神只反求暫向領邊宣主澤每先天下為民憂  
藩方久袖為霖手百萬蒼生願未酬

追挽監簿李公

誰將偽學浣忠良滿眼脂韋時樣粧敢斥弘羊蘇歲旱  
始驚鳴鳳見朝陽生前運蹇官三品死後流傳紙一張  
前輩遺風今寂寞狂歌聊復弔清湘

送表伯朱丞尉

瘴嵐窟裏抱琴歸  
髭鬚青青只舊時  
人道器之真鐵漢  
我疑方朔到瑤池  
從前日月忙中過  
此去山林分外宜  
晚歲栽培無別計  
萬金良產在孫枝

十年踪跡兩相望  
邂逅崆峒喜欲狂  
見說橋成鞭巨石  
忍看水駛舞歸艍  
面無慚色言何恤  
民有遺思味最長  
故國尊蘆勞夢想  
從公鷗浦弄斜陽

黎丞命飲辭之以詩

湛泉問訊十分春  
安得撻筇踵後塵  
不是稽山無賀老

定應坐客畏陳遵。鳬飛渤島姑容我馬繫堂階解笑人。  
重約蕉坑新茗熟。一鷗相對話情親。

為曾僉喜雨

隔年亢旱到初春。才掛征帆雨浥塵。諒得靖共神所介。  
更留約束後來遵。今朝南浦悲行子。明日陽關憶故人。  
老我滯留歸未得。斗升全為白頭親。

史宰見和依韻為謝

巧釀河陽滿縣春。居然盡洗簿書塵。桑間馴雉誠為異。

渚畔飛鷗祇漸遵良玉自應求即我明珠寧肯暗投人  
冷官竊笑詩情淺無計能令子建親

依韻戲呈諸丈

雲萍邂逅總青春意氣飄飄足絕塵酒有盈樽聊共醉  
食無重味恐難遵

是日有不許用  
猪羊肉之令

浮生百歲風和月官

路連年我送人自此彈冠知有喜莫言非故亦非親

再呈曾僉

去去榮觀上國春幾人竚立望車塵如星於北常懷拱

自海而南不必遵

初欲去南海遊

簷雨挑燈三益友錦帆載酒

一詩人勲名自致男兒事莫倚金張肺腑親

諸公約會縣中觀燈不克赴既又見趣座中賦

一章

上元花市明如晝良會應知臭味同自笑無穀似坡老  
豈能載酒過揚雄

是夜不  
及攜具

寒盟如我顏生赤燒燭輸君

坐照紅莫憶遶梁聲未斷且將詩酒謝春風

即席次府判韻



梨園勝日問春光  
細細飄來滿院香  
色縞半空天與潔  
花翻六出雪呈祥  
月華巧幻溶溶景  
風韻偏宜淡淡粧  
深夜霓裳欲飛舉  
篝燈何惜共徜徉

興教寺勸農呈史君

自從幽雅無傳後  
漢有龔黃宋有羅  
夙駕朱轡勤勸相  
奉宣黃紙放催科  
一犁烟雨郊原曉  
千里春風嶺嶠和  
看取便民橋下水  
滿江濃綠漲恩波

挽安人陳氏

節義千年一縷縈復因緩急見高情風霜凜凜欺行役  
天地昭昭監此誠羞藻敬恭宗祀重空花了悟世緣輕  
歸時認得來時路暗想蓬萊是故程

別倅車

聖朝疎網示寬平鞠讞煩公六月行穿屋可嗟囂訟險  
持衡只在此心明蘇冤去釋五原旱了事歸看快閣晴  
檢點舊遊章世美甘棠蔽芾滿江城

餞羅使君 二首

聖朝選表作公卿如此才猷合要津上亦知公能體國  
心乎濟物不謀身梅花嶺下忽千里荷橐班中添一人  
民願借留留不得多應留與十分春

西鄰有女出深閨十二樓中奉盥匱大德愛憐知有造  
小心壯肅但無欺請為公祝千年壽恥學人填半額眉  
舊著衣裳今好在芳心暗逐錦帆移

令佐約登息梅嶺不克赴次來韻

撐空一嶺鎮東隅未遂登臨且按圖城雉崢嶸歸眼界

徑蛇盤屈透雲衢  
句中風月天無盡  
物外亭臺山不孤

令佐才高當辦此  
稍容拙者自嬉娛

坡云才者不用拙者娛

喜雨上史使君馮宮講

平田秋水高潺湲  
大府寬條俶布宣  
不早猶應言有旱  
省儉敢自謂無言  
倒翻雲外菩提水  
幻出人間擺柳天  
阡陌曉來傳好語  
作霖人在領梅邊

湛泉酌餞黎有詩壁間遂次其韻

幾人林下賦歸休  
公獨翩然汗漫遊  
味道不妨寒似水

入時須用曲如鉤從來鄰父皆邀去底事官曹挽不留  
後夜相從那復得月明千里故山秋

壽馮宮教

三首○巳卯十二  
月初六日丑時

子月陽從律管回剛明鍾聚濟時材出當聖世千齡會  
小為橫江百姓來生意無窮倉有粟春工不擇地宜梅  
從今拈出經綸手吾道輝光壽域開

文星照耀大江濱春色無邊上藻芹千載魯宮覃美化  
百年洛學嗣清芬但同南國歌申伯敢效東坡壽外君

子由已 誰謂廣文官舍冷眼前突兀連雲  
卯生

公占金華寶婺纏我生劍氣斗牛邊雲山闊遠一千里  
歲紀參差三十年初度漫言同日月榮枯相去異天淵  
香山不鄙兼暮少名節當參九老傳

送游同年赴增城征官

踏雪南征靡憚勞此公端不為錐刀能行所學官無小  
苟利於民譽自高鞭算何須窮孔穴荆班且共說風騷  
吏姦民蠹渾閒事臨政先教立脚牢

再用韻

君行嶺海獨賢勞我念鄉關折大刀心事有如江水白  
誼風端共庾山高理財只合從周禮飲酒何妨讀楚騷  
客至無羶相諒得請將詩句當共牢

次宮教六齋慶成韻 二首

魯侯脩泮幾千年盛事相符易地然夏屋渠渠高挿斗  
誨言歷歷煖於羶簡編有味芸香細風月無邊草色鮮  
樂道簞瓢亦人耳安居何憚士希賢

邪傾枝拄費三年草故圖新有待然凌雨千間駢紫佩  
瀛溪一派寶青氈韶鳴已覺俱忘味鼎養何妨更擊鮮  
師帥作成真有道詵詵弟子信皆賢

宮教再以詩來復次韻

蚤負才名四十年胷中成室總天然承流且建偏州學  
談道終分廣厦氈椽筆發揮春藻麗鸞旂照映雪花鮮  
幾人魚躍鳶飛下黃卷生涯對聖賢

陳府判邀遊梅關



庾嶺蒼蒼古復今公餘杖履愜幽尋  
兩崖峭壁風霜骨一片清泉佛祖心  
靜浣世緣揮酒椀更添春色上梅林  
冥搜翻學詩情拙滿眼皆詩祇用吟

勸農上宮教

竹馬兒童喜欲狂循良太守似龔黃  
倉庚百轉蠶桑啓布谷一聲稷稻香  
耕饁盡陶幽國化遊嬉已遍舜民鄉  
文書便合登高閣為說東郊入務忙

時改比屋鄉  
為舜民鄉

中秋對月有懷

前年今日文闈裏鏖戰紛紛酣萬蟻去年歸去浙江頭

塵滿征衫未曾洗今年又對梅花嶺日味齏鹽翻故紙

乾坤一季兩中秋

閏八月

兄弟三人各千里

南安至豐城  
一千里

至江夏  
一千里

伯兄恍作期年別夏口武昌幾山水季弟秋初

辭母去去日不堪重倒指孔懷一念我既然伯季念吾

亦如此天涯海角渺相望蓬轉萍浮無定止古言秋月

只愁人人自關心何預此陰晴圓缺歲復歲離合悲歡

固其理何時當有二頃田歸卧雲山漱清泚烹茶煨栗

對秋輝老握團藥相爾汝此心炯炯明月知一醉狂吟  
聊復爾詩成鄉夢透泉溪人物山川亦良是殷勤多謝  
桂花風忽遣清香喚人起

溪泉命客

并引

五月二日錢蕭使于郊道遇史黎二丈言瀛  
父有湛泉新詩而未見因口占溪泉客一篇  
繼逢曾僉幙於小溪遞示  
詩本凡十一韻因併和之

湛泉泉水鏡樣明清溪溪水玉似清是中風物俱可人  
一塵不到世界輕詩家者流脩水裔筆頭春工不擇地

川君水靈聖得知爭遣酒兵互招致泉聲似喜嘉客到  
泐泐琴鳴徐弄操兩榕偃僂巧逢迎萬竹敲鏗當呵導  
清溪忽走間使來言傳號渙驅風雷鼻祖校文遊覽舊  
對壘者誰人姓柳山谷考試南安有贈柳朝散詩是夜瀛父亦為倅車邀去清溪閣不及竟  
湛泉之百年遺事償可徵今夕尋盟一盃酒客間斯言  
席故云但唯唯熊掌固奇魚亦美賞心樂事古難并到此如何  
決行止凭欄會意夢非夢止者靜兮流者動嗟嗟此水  
真吾師去流皆可隨所之揮手謝泉歸路晚風雨瀟瀟

溪上館明朝收拾入新詩  
兩處溪泉皆意滿

獨坐

長江釀碧山滴藍書堂枕北戶  
啓南無人與言畧為二  
邀月對影聊成三澄清萬慮了  
無據漁獵百氏幾如貪  
觀蘭玩石亦何好平生嗜好有所耽  
沈煙紛郁醒宿醉  
松風清越供幽談反觀靜照默有契  
森然衆理俱包涵  
羈窮紛紛歎荼苦真味往往如飴甘  
客來問訊主人處  
春風軒下榻睡酣

春補揭榜史君為詩以農諭學次韻為謝

東郊前日勸農民泮宮今日勸諸生  
勸農直欲使家給  
勸士詎止隆鼎烹新詩隨寓有規益  
筆勢滾滾今長庚  
芹藻生春鵠袍肅聽說筆耕同鐵耕  
情田鋤治付編簡  
儒藻溉灌須陶冶善根深培恐未固  
惡念痛絕猶潛萌  
因農諭學良切至一理通貫昭然明  
下民蚩蚩每難悟  
不勸安得千倉盈讀書為士豈待勸  
勸且弗勉真炫名  
本然之天我固有踐履須踏實地行  
要知為仁在乎熟

本無內外無將迎歲猶有歎道常富士實為重農為輕  
賢侯之文菽粟味雖出遊戲皆真情居窮勿但作魚蠹  
官達還戒專蠅營信能行此乃有獲不負魯泮鳴鸞聲

清正存稿卷六



欽定四庫全書

清正存稿

附錄

年譜

公諱鹿卿字德夫隆興府豐城縣人徐出於伯翳自漢  
南州孺子著名豫章至本朝大中祥符元年有仲孺者  
擢進士第嘗歷顯宦系出陵祖世居覺溪至五世祖諱  
簡徙居正信鄉之歷山曾大父諱文貴贅居同鄉之後

泉始為後泉里人祖諱洪源父諱琮累贈朝散大夫前  
妣王氏累贈令人妣甘氏封太孺人累贈令人

淳熙十六年己酉十一月壬申日丑時公生於後泉之

故居

是夕有青蛙甚巨出於甘夫人寢  
室已而生公紫衣覆體人咸異之

嘉定六年癸酉秋八月丁大夫公憂

九年丙子秋八月秋賦已在選中有司以重用字降魁

亞選

十二年己卯春正月立青雲課社

十三年庚辰分類編漢唐紀傳本末

十五年壬午秋九月領鄉舉

十六年癸未春二月試禮部中第三等 夏五月對策

集英殿勅賜進士及第授迪功郎南安軍軍學教授

冬十二月之任

十七年甲申立養士綱條 議政 白太守議便民二

事

寶慶元年乙酉代守奏便民三事 白太守論茶引事

白太守論三寨事 白太守論南安縣事 白太守

論特筆徒刑事 白太守論楮幣界分 以登寶位赦

恩循修職郎 秋八月校文廬陵

二年丙戌春二月白太守論立限撰勸農文 白太守

論釋奠改用仲丁 秋七月修學覈租 九月子子志

生 白太守為胡公夢昱評事

三年丁亥春三月滿替離橫浦 在任舉主 是歲以

舉主考第及格繳納脩職郎改作奏舉闕陞縣令循從

政郎 用南安軍教授任滿賞循文林郎 九月差充  
福建路安撫司幹辦公事

紹定元年戊子春暉堂成

三山鄭  
湜書扁

二年己丑夏四月味書閣成 冬十一月之福建任

三年庚寅春正月泐檄道劍賑給流民

四年辛卯夏四月以慶壽赦恩循承直郎 秋八月校

文漕闡 秋九月都城災應詔上封事 冬十二月奉

檄慮囚于長樂福清永福三縣

五年壬辰秋九月大閱軍士有偶違節制者因公言得  
貸命閩人作三歌 冬十二月滿考准部符舉主考第  
及格不候替人離任赴部改官 在任舉主

六年癸巳春正月班改授奉議郎知南劍州尤溪縣

三月歸自任所曾大參制置江淮辟公為屬以母老辭

冬十月泉州守西山真公辟知泉州南安縣 冬十一

月到任始至首罷科斂之無名者

端平元年甲午春正月草預借 明版章 二月勸農

救荒 夏六月丁甘太夫人憂 秋八月有旨令赴都  
堂審察 冬十一月塋太夫人

二年乙未春二月子子中生

三年丙申春三月有旨特與起復令日下赴樞密院稟  
議并降促行指揮公力具狀辭免乞與敷奏收回成命

夏四月密劄促行具狀再辭 附遞白政府論稅畝

秋九月有旨令服闋日赴樞密院稟議 冬十月至

任所堂稟論待敵救楮二劄 論儲才寇賞二劄 論

遣使事宜 論楮價折閱 十一月除主管官告院丁  
卯申省為江陵制司乞再科撥官告及秤提官告

四年丁酉春三月除幹辦行在諸司審計司 乙巳申

部謂不當幫放史佑神米麥 夏四月除國子監主簿

秋九月除樞密院編脩官 冬十月劄權右司議楮

十一月主管華州雲臺觀

三年戊戌公歸號泉谷樵友 菴山書院成 秋九月

差知建昌軍 冬十二月佩玉堂成



三年己亥春正月申審朝辭 三月以磨勘轉承議郎

夏四月到任 諭賊 訓練戍兵 秋八月乞祠不

允 九月有旨令赴行在奏事辭免不允 冬十月草

秋苗受納之弊 十一月癸巳南豐賊首倡亂遣兵討

捕至十二月丙申平之 十二月朔除度支郎官兼右

司辭免不允 請假過家拜掃

四年庚子春正月辛未解郡印 二月朔入國門得旨

先次供職令闔門引見上殿 丁丑上殿奏事 夏四

月除侍左郎官兼右司 白廟堂論楮弊 六月除右

司郎官 再條具易楮事宜 辛巳改兼玉牒所檢討

官 八月差主管華州雲臺觀以盱江平寇特轉朝奉

郎 九月除江東運判辭免不允 白廟堂論易楮

准朝旨任責梓提三郡會子備榜曉諭 上廟堂論中

半及新舊分數入納書 附奏乞科撥糴米賑濟饑民

淳佑元年辛丑春正月復廟堂言楮弊二書 戰姦民

賑貧乏 收遺棄 減賑惠庫息錢 二月被旨往當

塗巡歷 決淹獄 劾知太平州岳珂在任不法 三

月庚寅除兼權知太平州時暫交割制置茶鹽司職事

五月差充江東提領官辭免不允 秋七月除浙東

提刑辭免不允 冬十月丙申除直秘閣依舊浙東提

刑兼權浙東提舉辭免不允 丙午以磨勘轉朝散郎

在任舉官 冬十月甲戌到任 十一月海寇被旨討

捕 十二月戊午至處州 乙亥抵溫州施行鹽政

二年壬寅劾承奉郎林志行紹興府司理趙希肱台州

天台縣主簿郎應辰不法 五月差主管紹興府千州

觀 秋七月差知泉州 九月改知贛州

三年癸卯春三月除浙西提刑 秋七月除江淮都大

提刑

四年甲辰冬十一月御筆召赴行在辭免是月除寶章

閣知寧國府兼江東提舉兩辭免不允

五年乙巳春二月除右司辭免不允 夏四月朔入國

門磨勘轉朝奉大夫 孟亨除太府少卿兼權右司郎

中辭免不允 上殿奏事 六月除兼中書門下省檢

正諸房公事辭免不允 應詔薦士 秋七月除兼崇

政殿說書辭免不允 八月戊寅進講尚書讀九朝通

略通鑑綱目 九月進明堂頌 己未進講 冬十月

壬戌進講 奏已見 乙丑進講 同日進故事 乙

酉進講 十一月乙未進講 癸卯進講 戊辰進講

乙卯除太府卿辭免不允 戊午旨賜御書味書閣

遺安堂六大字謝表 十二月戊辰進講 乙巳進故

事 癸未進講

六年丙午春正月直前奏事 癸丑論政府制國用并

乞釐正檢正官名 甲寅進講 二月辛酉朔進故事

甲子進講 同日經筵奏乞免兼校正 戊辰進講

三月壬辰進故事 戊寅進講 丙戌除右文殿脩

撰知平江府兼淮浙發運副使 閏四月連具辭免不

允 己酉丞相游奉御筆宣諭之任 五月到任 六

月約束科舉 九月大閱 冬十月勸駕 十一月乞

歸老不允 十二月再乞歸老不允

七年丁未春正月乞歸田里不允 二月勸農於虎丘

三月再乞歸里 夏四月乙巳召赴行在辭免不允

五月戊午除權兵部侍郎三辭免不允 秋八月乙

未望離吳門乞給告歸里 九月朔有旨令伺候內引

壬子入國門是日內引 丙辰除國子監祭酒再辭

免不允 供兵部侍郎職謝表 冬十月除權禮部侍

郎再辭免不允 供禮部侍郎職謝表 壬寅進故事

丁酉進故事

八年戊申春正月乞祠不允再乞祠不允 丁卯除兼

同脩國史兼實錄院同脩撰辭免不允 二月脩學宮

薦賢 三月丙辰進故事 六月戊戌除兼侍講辭

免不允 己亥進故事 秋七月除兼權給事中再辭

不允 辛酉進講 經筵奏已見 冬十月己卯進講

己亥進講 十一月丙辰乞免兼職再辭不允 甲

子乞免兼祭酒不允 戊辰進講 十二月乙亥進講



九年己酉春正月除禮部侍郎辭免不允 二月癸卯

再申前請辭賜帶

庚子除寶章閣待制知寧國府辭

免不允

夏四月再辭新命力乞掛冠

六月再辭免

仍乞守本官致仕

冬十月旨別與州郡差遣辭免并

乞休致

十月庚戌秋九月疾亟乞謝旨特轉一官進文華閣待

制致仕

丁亥公薨遺表聞詔贈四官謚清正

十二年壬子堃公本縣奉化鄉之桂林將軍山後林李  
公義山為狀後村劉公克莊撰神道碑端明殿學士陳  
公昉書并題蓋

詔誥

九年己酉春正月除禮部侍郎誥

貳卿之亞文昌衣冠華選春官之小宗伯禮樂攸司肆  
疇試可之賢爰錫申命之寵具官徐某廉隅有守悃悃  
無華理義悅心自得味書之趣謀猷告后不求當世之

名入綴從班久煩疊組瑣闥聳聞於風采橋門久賴於  
師資史院推長經帷賴益惟虞書重秩宗之任而漢制  
著滿歲之文宜遂為真式昭至春日月獻納期愈罄於  
忠規夙夜寅清尚翊成於邦典祇若予訓毋有遐心直  
舍入院陸德輿行

辭免禮部侍郎不允詔

勅某省所奏辭免除禮部侍郎兼職依舊日下供職恩  
命事具悉舜命夷夔典禮樂終身不易而書有陟明之

文卿以儒學端介攝貳宗伯才兼數器選要秩清逾歲  
為真僉言允穆乃欲求去何也前受是則辭非奚庸稽  
首以遜昔者病而今愈正資造膝之規汝往欽哉毋拂  
朕意所辭宜不允故茲詔示想宜知悉

再辭免不允詔

勅某省三省進呈卿狀乞給告三月歸里療黃并治醫  
藥或與祠祿事具悉卿樸茂篤實為時老成久貳儀曹  
甫茲正位入陪經幄多所沃心況銀臺綱紀之所闕壁

水範模之所係職任至重正有賴焉乃以疾諗爰及其  
私昔漢制吏病滿三月乃賜告然亦不得歸也卿雖微  
疾聞發動有時方春時和何恙不已其存精神止念慮  
輔助醫藥以自持請告祈閒非所願聞也所請宜不允  
故茲詔示想宜知悉

秋九月疾亟乞謝事旨特轉一官進文華閣待  
制致仕誥

承明厭直久從均佚之遊神武掛冠遽有辭榮之請重

違其志姑遂爾高具官其悃悞無華果毅以達為諸侯  
客且烜赫於聲猷乘使者車屢振揚於風采入儀從橐  
采聲忠規領大司成則能令六管無譁兼小門下則何  
止二勅執議俄以疾而引去雖欲畱而不能側席思賢  
方擬促蒲輪之召垂車謝事乃竟惟菊徑之安徒慨嘆  
其英風庸務全其晚節爰進漢官祿階之寵載陞媯閣  
次對之華既明且哲以保身何慙大雅視履考祥其造  
吉益燕脩齡中書舍人陸德輿行

封豐城縣開國男食邑三百戶誥

清廟之祀文王周歌顯相甘泉之見上帝漢紀侍祠眷  
言重屋之威儀允賴重臣之秉德既成熙事宜舉慶條  
具官徐某篤實秉資端方植操典朕三禮正資小宗伯  
之賢誨我諸生允藉大司成之重夕瑣風生於駁正露  
門日贊於緝熙屬時明禋率職必助茲溥均於祭澤庸  
昭答於賢勞啓爾爵封錫之采邑雖曰彞章之舊是惟  
眷命之新其懋遠猷以綏燕譽中書舍人陸德輿行

史志

宋史本傳

徐鹿卿字德夫隆興豐城人博通經史以文學名於鄉  
後進爭師宗之嘉定十六年廷試進士有司第其對居  
二詳定官以其直抑之猶置第十調南安軍學教授張  
九成嘗以直道謫居鹿卿撫其言行刻諸學以訓先是  
周敦頤程顥與其弟頤皆講學是邦鹿卿申其教由是  
理義之學復明立養士綱條學田多在溪峒異時征之



無藝農病之鹿卿撫恤無逋租者其後盜作環城皆燬  
惟學宮免曰是無撓我者辟福建安撫司幹辦公事會  
汀邵寇作鹿卿贊畫備禦動中機會避寇者入城多方  
賑濟全活甚衆郡多火災救護有方會都城火鹿卿應  
詔上封事言積陰之極其徵為火指言惑壁寵溺燕私  
用小人三事尤切真德秀稱其氣平論正有憂愛之誠  
心改知尤溪縣德秀守泉州辟宰南安鹿卿以不便養辭  
德秀曰道同志合可以拯民何憚不來鹿卿入白其母

欣然許之既至首罷科斂之無名者明版籍草預借決  
雍滯達寬抑邑以大治德秀尋帥閩疏其政以勸列邑  
歲饑處之有法富者樂分民無死徙最聞令赴都堂審  
察以母喪去詔服闋赴樞密院議首言邊事楮弊主管  
官告院幹辦諸司審計司故相子以集英殿脩撰食祠  
祿又幫司農少卿米麥鹿卿曰奈何以一人壞成法持  
不可遷國子監主簿入對陳六事曰洗凡陋以起事功  
昭勸懲以收主柄清班著以儲實才重藩輔以蔽都邑

用閩越舟師以防海合東南全力以守江上皆嘉納改  
樞密院編脩官權右司贊畫二府通而守法會右史方  
大琮編脩劉克莊正字王邁以言事黜鹿卿贈以詩言  
者并劾之太學諸生作四賢詩知建昌軍未上而崇教  
龍會兩保與建黎原鐵城之民脩怨交兵鹿卿持書諭  
之斂手聽命既至則寬賦斂禁掊克汰贓濫抑強禦恤  
寡弱黥黥吏訓戎兵創百丈砦擇兵官城屬縣治行大  
享田里歌頌督府橫取秋苗斛面建昌為米五千斛鹿

卿爭之曰守可去米不可得民恐失鹿卿請輸之以共命鹿卿曰民為守計則善矣守獨不為民計乎卒爭以免召赴行在將行盜發南豐捕斬渠首二十人餘不問擢度支郎官兼右司入對極陳時弊改侍右郎官兼勅令刪脩官兼右司鹿卿又言當時並相之弊宰相以甘言誘鹿卿退語人曰是牢籠也吾不能為宰相私人言者以他事詆鹿卿主管雲臺觀起為江東轉運判官歲大饑人相食留守別之傑諱不詰鹿卿命掩捕食人者

尸諸市又奏援真德秀為漕時撥錢以助賑給不報遂  
出本司積米三千餘石減半價以糶及減抵當庫息出  
緡錢萬有七千以予貧民勸居民收子遺孩日給錢米  
所活數百人宴集不用樂會岳珂守當塗制置茶鹽有  
詭興利橫斂百出商旅不行國計反絀於初命鹿卿覈  
之吏爭竄匿鹿卿寬其期限躬自鈎考盡得其實珂辟  
置貪刻吏開告訐以罔民沒其財民季士賢有稻二千  
石囚之半歲鹿卿悉縱舍而勸以其餘分皆感泣奉命

珂罷以鹿卿兼領太平仍暫提舉茶鹽事弛苛征蠲米  
石蕪湖兩務蘆稅江東諸邦飛蝗蔽天入當塗境鹿卿  
露香默禱忽飄風大起蝗悉度淮之傑密請移鹿卿浙  
東提點刑獄加直秘閣兼提舉常平鹿卿言罷浮鹽經  
界鰾地先撒相家所築就捕者自言我相府人鹿卿曰  
行法必自貴近卒論如法丞相史彌遠之弟通判溫州  
利韓世忠家寶玩籍之鹿卿奏削其官初鹿卿檄衢州  
推官馮惟說決務惟說素廉平至則辨曲直出淹禁大

家不快其為會鄉人居言路乃屬劾惟說笑曰是猶可  
以仕乎自題詩印紙而去衢州鄭逢辰以繆舉鹿卿以  
委使不當相繼自劾且共和其詩御史兼二人劾罷之  
及知泉州改贛州皆辭遷浙西提點刑獄江東都大坑  
冶皆以病固辭遂主管玉局觀及召還又辭改直寶章  
閣知寧國府提舉江東常平又辭淳祐三年以右司召  
猶辭丞相杜範遺書曰直道不容使人擊節君不出豈  
以馮惟說故耶惟說行將有命矣鹿卿乃出擢太府少

卿兼右司入對請定國本正綱紀立規模時事多艱人心易搖無獨力任重之臣無守節仗義之士願早決大計上嘉納之兼中書門下省檢正諸房公事兼崇政殿說書逾年兼權吏部侍郎時議使執政分治兵財鹿卿執議不可以疾勾祠遷右文殿脩撰知平江府兼發運副使力勾祠上諭丞相挽留之召權兵部侍郎固辭上令丞相以書招之鹿卿至又極言君子小人切於當世之務兼國子祭酒權禮部侍郎兼同脩國史兼實錄同



脩撰兼侍講兼權給事中鹿卿言瑣闥之職無所不當  
問比年命下而給舍不得復請復舊制從之上眷遇深  
篤而忌者寔多有撰偽疏托鹿卿以傳播歷抵宰相至  
百執事鹿卿初不知也遂力辯上前因乞去上曰去則  
中姦人之計矣令臨安府根捕事連勢要獄不及竟遷  
禮部侍郎累疏告老授寶章閣待制知寧國府而引年  
之疏五上不允提舉鴻禧觀遂致仕進文華閣待制卒  
遺表聞贈四官鹿卿居家孝友喜怒不形恩怨俱泯宗

族鄉黨各得歡心居官廉約清峻毫髮不妄取一廬僅  
庇風雨所著有泉谷文集奏議講義鹽楮議政彙歷官  
對越集手編漢唐文類文苑英華論清正

江西通志列傳

徐鹿卿字德夫豐城人博通經史以文學名嘉定十六  
年舉進士調南安軍教授改福建安撫司幹辦公事會  
都城災應詔上封事指言惑嬖寵溺燕私用小人三事  
尤切真德秀守泉辟宰南安邑以治最聞遷國子監主

簿入對陳六事上皆嘉納累擢太府少卿兼右司復奏  
請定國本正紀綱立規模上欣納之眷遇益篤改禮部  
侍郎授寶章閣待制知寧國府提舉鴻禧觀遂致仕進  
文華閣待制卒鹿卿居家孝友守官廉峻所著有泉谷  
集行於世

江西叅政林庭楫  
副使周廣纂脩

### 江西通志名宦傳

徐鹿卿為南安軍學教授先是周敦頤與其門弟程顥  
程頤皆講學是邦鹿卿申其教由是理義之學復明立

養士綱條學田多溪峒鹿卿撫恤無逋租者其後盜作  
惟不燬學宮曰是無撓我也

纂修  
前人

豐城縣志

徐鹿卿字德夫後泉里人博通經史以文學名後進爭  
宗師之嘉定登進士調南安軍學教授張九成嘗以直  
道謫居鹿卿撫其言行刻諸學以訓先是濂溪二程皆  
講學是邦鹿卿申其教由是理義之學復明改福建安  
撫使會都城災應詔上封事言積陰之極其證為火指

言惑寵嬖溺燕私用小人三事尤切真德秀尋帥閩疏  
其政以勸列邑遷國子監主簿入對陳六事上皆嘉納  
改右侍郎兼右司又極言當時並相之弊宰相以甘言  
誘之鹿卿退語人曰是牢籠也吾不能為宰相私人言  
者以他事詆鹿卿主管雲臺觀起為江東轉運判歲大  
饑人相食鹿卿命掩捕食人者又出倉粟減市值之半  
以糶秋乃糶償諭民收養遺棄官與賑給遷浙西提點  
刑獄江淮都大坑冶皆以病固辭遂主管玉隆觀改崇

政殿說書轉對論儲相謂侍從者執政之儲執政者宰相之儲當於人才之有學力才力心力者學欲其正而通才欲其弘而毅心欲其公而大經筵講棠棣詩反覆天理人心之變為濟即發也遷禮部侍郎累疏致仕進文華閣待制仕宦二十年歿之日家無餘貲謚清正爵國男

浙江通志官師志

徐鹿卿字德夫豐城人嘉定進士調南安軍教授嘗應

詔上封事真德秀稱其氣平論正有憂愛誠心時宰相以甘言誘鹿卿退語人曰是牢籠也吾不能為宰相私人竟以事出主雲臺觀越月起為江東轉運判官歲大饑人相食鹿卿設法賑救全活甚衆遂移浙東提點刑獄丞相史彌遠之弟通判溫州利韓世忠家寶玩籍之鹿卿奏削其官淳熙三年以右司召丞相杜範遺書促之廼出進文華閣待制卒所著有泉谷文集奏議講義鹽楮議政稿歷官對越集手編漢唐文類文苑英華謚

清正

浙江提學副使  
薛應旂纂脩

八閩通志方面名宦傳

徐鹿卿字德夫隆興豐城人嘉定間教授南安軍辟幹  
辦福建安撫司公事會汀邵寇作鹿卿贊畫備禦動中  
機會避寇者入城多方賑濟全活多人郡多火災救護  
有方後改知尤溪縣真德秀守泉復辟宰南安鹿卿居  
官廉約清峻毫髮不妄取

莆人督學僉事前  
翰林黃仲昭纂脩

八閩通志郡邑名宦傳



徐鹿卿與真德秀同時德秀守泉以其道同志合可以拯民辟宰南安既至首罷科斂之無名者明版籍革預借決壅滯達冤抑邑以大治歲饑處之有法富者樂分民無死徙德秀尋帥閩疏其政以勸列邑

纂修前人

### 福州府志名宦傳

徐鹿卿字德夫豐城人嘉定間教授南安辟幹辦福建安撫司公事會汀邵寇作贊畫備禦動中機會避寇者入城多方賑濟全活甚衆郡多火災救護有方後改知

尤溪真德秀守泉復辟宰南安居官以廉約清峻聞

正德

十四年郡人南京兵部尚書林翰纂脩

福州府志名宦傳

徐鹿卿字德夫豐城人嘉定間教授南安辟福建安撫司幹辦官會有汀邵寇鹿卿贊帥禦之民避入城者多

方賑濟全活甚衆

萬歷六年郡人禮部尚書林煥纂脩

福州府志名宦傳

徐鹿卿字德夫豐城人嘉定間辟幹辦福建安撫司公

事會汀邵寇作鹿卿贊畫備禦動中機會避寇入城者  
多方賑濟全活甚衆郡多火災救護有方鹿卿居官廉  
約不妄取

萬歷四十年郡人南京工部尚書  
林煙吏科都給事中林材纂脩

### 閩大記名宦傳

徐鹿卿字德夫豐城人嘉定間福建安撫司幹辦公事  
鹿卿守官清苦講明正學閩士宗之會汀邵寇發贊帥  
備禦動中機會民避寇入城多方賑恤全活者無算改  
知尤溪縣真德秀守泉辟知南安始至首罷無名科斂

草預借明版籍勸農救荒未及期年邑遂大治德秀尋  
帥閩疏其政以勸列邑鹿卿官至禮部侍郎謚清正侯官

野史王應山纂輯  
男王毓德編次

泉州府志名宦傳

徐鹿卿字德夫豐城人嘉定十六年進士嘗辟福建安  
撫司幹辦公事都城火鹿卿應詔上封事言積陰之極  
其徵為火指言惑嬖寵溺燕私用小人三事尤切改知  
尤溪縣真德秀守泉辟宰南安縣既至首罷無名之賦

明版章草預借決壅滯達冤抑邑以大治歲飢諭民以  
相調之道富者樂分貧無死徙德秀尋帥閩疏其政以  
勸列邑最聞令赴都堂審察以母喪去

隆慶二年郡人  
刑部尚書黃光

昇戶部侍郎  
黃養蒙纂脩

### 泉州府志名宦傳

徐鹿卿紹定六年知南安縣既至首罷無名之賦明版  
籍草預借決壅滯達冤抑邑以大治歲饑諭民以相周  
之義富者樂分貧無死徙真德秀疏薦於朝以母喪去

萬歷四十年郡人禮  
部尚書黃鳳翔纂脩

紹興府志名宦傳

徐鹿卿字德夫豐城人嘉定中進士調南安軍教授嘗  
應詔上封事真德秀稱其氣平論正歷江東轉運判官  
歲大饑人相食鹿卿設法賑救全活甚衆隨移浙東提  
刑兼提舉常平鹿卿請罷浮鹽經界贖地先撤相家所  
築就捕者自言我相府人鹿卿曰行法必自貴近始卒  
論如法丞相史彌遠之弟通判溫州利韓世忠家寶玩

籍之鹿卿奏削其官終文華閣待制謚清正

萬歷十四年郡人左

春坊諭德張元祚太常少卿孫鑛纂脩

跋徐德夫所藏朱文公五帖

宋真德秀

浦城人資

政殿學士

予聞徐君德夫之賢未之識也獨見其漕臺所發策意其蓋嘗從事於諸老先生之學者今乃以文公數帖來示其於遺墨且寶之如此則公之格言大訓必嘗服膺奚疑諸帖所以告學者雖不同要弗越致知力行四字

德夫深玩實體而守之終身異時所到將有不可涯涘者德夫其懋之

味書閣記為德夫右司作

宋劉克莊

莆田縣人

禮部

尚書

閣在豐城山間名子賤潘公也筆廣微袁公也德夫讀書其上有年矣去而仕於朝因以其所讀者為天子言之忠憤激發幾寤上意竟坐是由省闥放還故山或竊笑曰世益有剽竊涉獵書之豪芒而光顯遇合者德夫



無所不讀顧齟齬留落如此意者書誤德夫耶德夫寧  
能常味此無味之味耶德夫亦笑曰有是哉夫書無窮  
盡味有淺深嘗試以古今人觀之行之篤守之固味之  
深者也先信而後畔始合而卒離味之淺者也叔孫通  
魯兩生皆學禮一以取封一沒世無聞舒弘皆學春秋  
一起徒步拜相一老擯郡國豈非深者守道而難合淺  
者諧世而易售歟使其果深於書粹如山岵也脫粟太  
牢也苟為不然如啗土炭如嚼蠟久將唾棄之矣然則

德夫之所味固世之所不能味世之所味固德夫之所不屑味歟或又笑曰閣僅三間奚其記余曰不然石渠夫祿高則高矣而不能逃莽大夫之譏臨春結綺美則美矣而不能渝狎客之謗德夫閣雖小聖賢之事具焉古今之變合焉天下後世之責在焉德夫味之不已出則為遺直為名臣處則為高士為全人是閣與天壤俱敞矣勿記可乎

清正存稿附錄